

vali de hungari contra, i qual za parte son passadi da Sazil a Treviso *etc.*, a questi capi et oratori regij li sia dato ducati 50 al zorno per spexe. Dita raina alozerà in la caxa dil ducha di Ferrara, la qual *honorifice* vin preparata; et *etiam* è stà tolto, per l' officio di le raxon vechie, altre 16 caxe, con 14, 16 et 20 leti per una. *Etiam* fo dato alozamento a li hungari etc. E fu diliberato farli grandissimo honor, e far ragatar homeni, *etiam* femene di le contrade, con palio di 40 ducati, farli una festa in palazo e darli altri piazeri.

Adoncha zonseno in questa terra, prima 7 oratori hungarici, con cavali 400, tra i qual è il ducha Lorenzo; et veneno per acompagnar la raina in Hongaria, si la vorà andar per terra. Ai qual, hessendo zonti a Trevixo, per sier Michiel Salamon, podestà et capetanio, li fo fato dir, che a Veniexia li erano stà preparato per suo habitation l' hospedal di Santo Antonio, nuovo. I qualli, come uditeno *hos sermones* se turborono, dicendo era locho indecente a l'horo, oratori di tanto re, non considerando la qualità dil loco, che era nuovo et non operato, et bellissimo. Or da Treviso veneno, per Sil, a Torzello, e arivadi a San Thomà di Borgognoni. Ai qual fo mandato 50 barche contra et 7 con zenthilomeni nostri, vestiti di scarlato, per condur quelli a Santo Antonio, dove era stà preparato. Risposeno, voleano star li ad aspetar la regina, nè voleano far questa inzuria al suo re de esser alozadi in hospedal; *tandem*, saputo questo, la Signoria mandono batando altre barehe con zentilhomeni, dichiarandoli esser preparato altri palazi in Canareio, condecanti a le sue grandeze; et cussi poi veneno a Veniexia.

Domente che si stava in expectation de intender i progressi de Ungaria contra turchi, a dì 17 luio, per letere di sier Sabastian Zustignan, orator nostro, date a Buda, a dì 9, se intese, come, hessendo el fio di Schander bassà a lo assedio de Jayza con tre a milia cavali, achade che a dì 2 luio, el zorno di Santa Maria, sorazonse novo capetanio di hungari, nominato . . . . ., qual con 3 milia cavali e pedoni, per far scorta a do a milia cara di formento, mandavano in Jayza, che *laborabat* quella per necessità di viver, et, arsaltadi, per tre volte fonno a le man con turchi, di qual turchi ne fo morti 500, presi da conto 36; *adeo* che turchi, con el fiol de Schander bassà, se ritrasseno al monte; *interim* fu posto le vituarie nel castelo. E, retornadi hungari, el sequente dì a la pugna, con promision de non se abandonar, messeno turchi in rota; et li presoni

fonno mandati al re; et ungari seguilava la victoria, per esserli zonto nuovo pressidio. E Schander bassà, inteso el fiol era in pericolo, vegniva con zente per darli socorso, e, inteso quello esser roto, ritornò indriedo. Da poi dita nova, per via di Cao d' Istria e di Cataro, fo confirmada. Et la Signoria nostra subito mandò il sumario di ditta letera a li rectori di Brexa, dove se intendeva la serenissima raina saria, acciò li se comunegi tal optima nova. Et cussi sier Marco de Molin, capetanio di Brexa, che la acompagnava fino a Verona, hessendo a Lonà, ricevete tal letere; et disse il tuto a la raina e li altri signori; e ave piacer. La copia di la qual letera sarà qui sotto scripta.

*Copia de una letera, o ver sumario, di oratori nostri in Hongaria, data a dì 9 luio 1502, a Buda.*

Che in quella hora era zonto al serenissimo re de Ungaria uno nontio dil magnifico domino Zuan Terecich, capetanio de sua maestà, con letere credential de sua magnificencia. Qual referite a la maestà predicta, et poi al reverendissimo cardinal legato existente de li, et a essi oratori, come a di primo de l' instante, hessendo acampato a torno Jayza el fiol de Scander bassà con cavali 6000 de zente fiorita e pedoni 4000, dicto domino Zuan Terecich, quale andava per meter vitualie in Jayza, se reduce sopra uno collo lontano da Jayza mja 5 italiani. Et che la note sequente el vene a lui el ban de Jayza, e nontioli che 1000 cavalli de turchi erano andati quella note ad uno castello, chiamato Chiovar, et che l' andasse con parte de le sue zente a ritrovarli, che l' haveva victoria. Di che, dicto domino Zuan Terecich, lassato ben in hordine el loco, dove havea reduto le vietualie, sì de repari como de zente, andò con cavali 2000 lizieri et 50 homeni d' arme. Et, sopraronzendo quella notte el fiol de Schander bassà, el zorno sequente, che fo a dì 2 de l' instante, dete una batalia al locho, dove erano poste le vituarie, et forono morti gran numero de' turchi et de' nostri christiani cercha 100. Et *hoc interim* sopraronse cavali 1000 de turchi, erano a Chiovar, et drieto l'horo vene *etiam* el prefato domino Zuan Terecich, in socorso de li sui, quale a dì 3 intrò in Jayza per socorer quella; dove vene tutto lo exercito turchesco, con presuposito de obsediarla; *tamen* stava in hordine, come si allora fusse stà per combater. Lo antedicto domino Zuan Terecich, vedendo che le vitualie stavano in pericolo et l'horo